



Uunga siunnersuut: Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat nr. xx, xx. xxx 2019-imeersoq.

(Aatsitassanut Suliffeqarnermullu Naalakkersuisoq)

(Siullermeerneqarnera)

Siunnersuummut Demokraatit imatut oqaasissaqarput.

Siunnersuutip nassuiaataani kisitsisit kingullit takutippaat lærlingit sungiusarlutillu sulisut suliffeqarfinni namminersortuni 55 procentusut, pisortat suliffeqarfiutaani 25 procent-it pisortallu oqartussaaffiini 20 procentiullutik. Taamaasilluni nalilerneqarpoq december 2018-imi suliffeqarfinni namminersortuni 277-inik ilinniartoqartoq sungiusaammillu sulisoqarluni, 173-it pisortat suliffeqarfiutaanniillutik kiisalu 232-t (138 + 94) pisortat oqartussaaffiiniillutik.

Kisitsisit takutippaat inuusuttortatta ilinniartinneranut namminersorlutik suliffeqarfiit akisussaassuseqarluartumik iliuuseqartut. Demokraatinit matumuuna namminersorlutik suliffiutillit pimoorussineranut qujaffingerusuppagut.

Piffissaq atorluarlugu Demokraatinit pisortaqaarfiit akisussaaffimmik tingusinerunissaannik kaammattorusuppagut tassami sulisartoqarnermi suliffiit 80 procentii pisortaqaarfiup suliffiutigimmagit. Sungiusarluni suliffiit taamaallaat 45 procentii piginerat naammanngilaq. Pitsaanerusinnaavoq.

Siunnersuut tunngavilersorniarlugu ilinniarfeqarfinnut apersuilluni immersugassamik nassiussuisoqarsimavoq lærlingit sooq ikippallaarnersut paaserusullugu. Ilinniarfiit 58-it akornanni 39-it akisimapput ilinniarfinni lærlinginik amerlanernik tiguisoqarsinnaanngitsaq.

Pissutaanerusut imatut nalunaarutingineqarput 1) illoqarfimmi inuussutissarsiutinut ilinniarfiup sumiiffigisaani ilinniartunut inissat inissiallu amigaataanerat (ilinniartitaanernit 15-iusunit), 2) ilinniartuuffissaaleqineq (ilinniartitaanernit 14-iusunit), aammalu 3) amerlanerusunik tigusinissamut ilinniarfiup illuutaani inissaaleqineq (ilinniartitaanernit 13-iusunit).

Akissutinit pissutsit allat tikkuunneqartut ukuupput: 4) ilinniartitsisoqarnermut atatillugu atorfinitsitsiniarnermi ajornartorsiutit, 5) sulisunut inissiat meeqqerivinnilu inissat amigaataanerat, kingulleq aamma lærlingit ilinniarfimiinnerisa nalaanni lærlinginut atuuppoq, aammalu 6) ilinniartitaanernut ataasiakkaanut qinnuteqartut piginnaasallit amigaataanerat.



Taamaalilluni ajornartorsiut aneq uaniippoq suliffeqarfiit piumanginnerat pequtaatani, sungiusaammik suliffissanik annertusaanissaq ilusilersugaanerup iluaniimmat.

Imatut paasillugu ilinniarfiit sammineqartut lærlinginik amerlanernik tigusinerusalerniarpata, sungiusarluni suliffissat amerlisaannarnagit, ilusilersugaanerup iluani unammillernartut qulaani eqqaaneqartut aaqqiiviginiarnerat aammattaaq suliniutigineqartariaqarput.

Peqqutit qulaani eqqartorneqartut iliuseqarfigingikkaluarlugit ilinniarfiit 58 akornanni 19-it lærlinginik amerlanernik tigusisallersinnaapput.

Amerlanernik sungiusaammik suliffissanik pinngortitsiniarneup unammillernartua sulisartoqarnerup soqutigisaqannginnerat kisimi pinnagu arlaqarnerusunik pissuteqartoq paasisutissat takutippaat. Sungiusaammik suliffissanik amingaateqarneq annertunerusumik – qulaani eqqaareernittuut – inuiaqitigiinni ilusilersugaanermi ajornartorsiutinik tungaveqarput.

Taamaalisukkut imminut akерlerisumik ajornartorsiuteqarpugut. Tassa suliffeqarfinni sungiusaatigalugu suliffissat inuttaqartinneqanngitsut. KTI nalunaarpoq massakut 318-inik inuttaqanngitsunik sungiusaammik suliffissaateqarlutik. Imatut paasillugu suliffeqarfiit lærlinginik tigusinnaangaluarput.

Demokraatit taamaamat sumi sungiusaammik suliffissaqarnerusooq, sumilu sungiusaammik suliffissat inuttaqartinneqannginnersut akimut ersittuunissaa isumassarsiaq paasisinnaavaat.

Sungiusaammik suliffissanut inatsisiliornissaq naammappa? Sungiusaammik suliffissaaleqineq – Naalakkersuisut nalunaaritigisaattut – ilusilersugaanerup iluani ajornartorsiutit, soorlu inissiasaaleqineq, qinnuteqaateqartartunik piukkunnaateqartunik amingaateqarneq, meeqqerivinnut inissaaaleqineq kollegianullu inissaaaleqineq aaqqiivigineratigut qaangerneqarsinnaangaluarput.

Demokraatit maluginiarpaat sulisitsisut akornganni siunnersuummut tapersersuisoqarmat, siunnersuutillu malitsigisaanik allaffissornermik suliasaanut akisussaaffimmik tiguseqataarusullutik nalunaarsimapput.

Demokraatit upperingilaat siunnersuutip uuma kisimiilluni sungiusaammik suliffissanik naammattunik peqareernitsinnut ajortartorsiutit aaqqiivigissagai, suliffissallu inuttassaqartinneqanngitsut siunissami aaqqissuussinerup malitsigisaannik inuttaqatalernissaat aaqqinneqassasoq ilimaginngilarput. Naalakkersuisullu siunnersuutaat ajornartorsiutip aaqqiiviginiarneranut ilapittuutaasinnaassappat Demokraatit ingerlaannaq itigartikkusunngilaat.

Demokraatinulli pingaaruteqarpoq siunnersuut annerusumik allaffissornermik malitsigisaannillu inuiaqatigiinnut annertunernek aningaasartutaannginnissaa.

Taamatut oqaaseqarlutik Demokraatit siunnersuut ataatsimitaliamut eqqortumut ingerlateqqikkusuppaat, tassani nalilersorneqassammat siunnersuut massakut aaqqissuussinermiik pitsanngortitsissanersooq paasiniarlugu.